

Pro Senectute è cunter l'iniziativa "200 francs bastan"

Sche l'iniziativa "200 francs bastan" vegn acceptada, perdan senioras e seniors lur vusch. L'iniziativa periclitescha purschidas d'infurmaziun per umans pli vegls ch'èn impurtantas per l'enragischaziun locala, il dialog tranter las generaziuns e la participaziun a la societad. Per quest motiv s'engascha Pro Senectute per in NA a l'urna.

«Cun la midada demografica crescha il dumber d'umans d'auta vegliadetgna ed uschia er il basegn d'infurmaziuns a basa da fatgs davart temas sco sanadad, digitalisaziun u midadas socialas», declera la presidenta da la fundaziun Pro Senectute Svizra Eveline Widmer-Schlumpf. Las emissiuns da la SRG SSR resguardan considerablmain quest basegn ed èn perquai indispensablas per umans pli vegls. Ellas dattan ina vusch a las senioras ed als seniors e fan punts tranter las generaziuns, quai ch'è impurtant en temps d'ina polarisaziun mediala adina pli gronda tranter giuven e vegl. Per Pro Senectute èsi perquai cler: in service public che cuntanscha tuttas e tuts na sa chapescha betg da sez, mabain è ina valur ch'i vala da proteger. Per quest motiv s'engascha Pro Senectute cunter l'iniziativa "200 francs bastan".

Garantir la giustia d'infurmaziuns

Tenor il studi Digital Seniors 2025 da Pro Senectute Svizra èn offline 11 pertschient dals umans en la vegliadetgna da pensiun. Bliers umans pli vegls han mo pitschnas cumpetenzas digitalas. Per questas persunas èn e restan il radio e la televisiun meds centrals per sa procurar infurmaziuns. Ina reducziun drastica dal sustegn finanziel periclita il provediment cun infurmaziuns da bieras senioras e bliers seniors. «L'intermediaziun d'infurmaziuns via ils chanals da la SRG SSR garantescha che tut las generaziuns han – independentmain da la vegliadetgna, las entradas u l'affinitad tecnica – access ad infurmaziuns d'auta qualitat», di Eveline Widmer-Schlumpf. Cuntrari a la SRG SSR s'orienteschan purschiders commercials primarmain tenor il radius da recepziun e l'attractivitat da las gruppas en mira. Umans pli vegls na tutgan en quel connex betg tar la grupp en mira principala – lur basegn d'infurmaziun vegnissan tralasciad. «In ferm service public resta indispensabel per garantir la giustia d'infurmaziuns en ina societad che daventa pli veglia», accentuescha Eveline Widmer-Schlumpf.

Rinforzar l'enragischaziun locala e la diversidad culturala

Gist per umans attempads è impurtanta in'enragischaziun locala da la rapportaziun per sa sentir colliads cun lur regiun. «Ina sminuziun massiva dal budget da la SRG SSR avess consequenzas spezialmain gravantas per ils programs locals ed ils formats che fan punts en ils secturs cultura, furmaziun e societad», di Eveline Widmer-Schlumpf. Plinavant garantescha la SRG SSR ch'infurmaziuns èn accessiblas per l'entira populaziun a moda simpla via radio, televisiun ed online. Per quest motiv beneventa Pro Senectute era la decisiun recenta da la SRG SSR da puspè derasar ses programs da radio via undas ultracurtas UUC/UKW.

Contact per las medias

Pro Senectute Svizra, Peter Burri Follath, manader da la communicaziun
telefon 044 283 89 43, medien@prosenectute.ch

Pro Senectute

Pro Senectute s'engascha dapi passa 100 onns per la populaziun pli veglia. Nus essan la pli gronda e la pli impurtanta organisaziun professiunala che porscha servetschs per persunas attempadas e lur confamigliars en Svizra. En pli cussegliain nus senioras e seniors e lur confamigliars gratuitmain en passa 130 posts da consultaziun. Nossa finamira è da sustegnair glieud pli veglia da viver uschè ditg sco pussaivel a moda autodeterminada en las atgnas quatter paraids.

Pro Senectute occupa passa 1'500 collavuraturas e collavuratur e lavura cun 17'700 persunas voluntaras. Var 700'000 umans en la vegliadetgna da pensiun e lur confamigliars nizzegian nossas purschidas. Pro Senectute è neutrala areguard la politica da partida e la confessiun. Dapi il 1942 è ella certifitgada cun il sigil da qualitat da ZEWO.